

無盡意菩薩經

第二

百一
周九

47783



七條
 辛酉年二月日重脩
 帝新銀昌
 轉輪常轉
 增輝
 法金剛院置
 山城州天安寺



無盡意菩薩經卷第二

周

宋涼州沙門智嚴共寶雲譯

尔時舍利弗語無盡意言善哉善哉善哉善男子
汝已快說菩薩羸提波羅蜜而不可盡唯願
仁者當說菩薩毗梨耶波羅蜜如諸菩薩所
得無盡毗梨耶波羅蜜無盡意言唯舍利弗
菩薩具足八事修行精進而不可盡何等八
發大莊嚴而無有盡積集勇進而不可盡修
行諸善而不可盡教化衆生而不可盡助道
功德而不可盡助無上智而不可盡助無上
慧而不可盡集助佛法而不可盡云何菩薩
莊嚴無盡於諸生死心不疲倦不計劫數當

成佛道若干劫在而作莊嚴若干劫在不作
莊嚴菩薩莊嚴所經劫數不可稱計如從今
日至生死本為一日一夜如是三十日為一
月十二月為一歲於是百千萬歲一發道心
一見如來如是發心所見諸佛如恒沙數於
尔所佛邊方得知一衆生心行如是遍知一
切衆生心之所行猶不退沒是則名曰不懈
莊嚴無盡莊嚴經於如是見佛發心知他衆
生心所行時常修具足檀波羅蜜尸波羅蜜
羸提波羅蜜毗梨耶波羅蜜禪波羅蜜般若
波羅蜜修集一切助菩提法具修相好十力
無畏不共之法具修一切諸佛法故是名不

懈莊嚴無盡莊嚴若有菩薩聞作是說不驚
不怖不畏當知是菩薩不懈精進是名菩薩
莊嚴無盡云何菩薩勇進無盡若三千大千
世界滿中盛火爲見佛故要當從是火中而
過若爲聞法教化衆生安止衆生於善法故
亦應如是從火中過是名菩薩勇進無盡何
因緣故名曰勇進常爲他故爲靜他故爲調
伏他故爲滅盡他故常不懈慢堅牢不退心
善安止於大悲中常勤精進而爲衆生故名
勇進菩薩行時步步御心悉向菩提常觀衆
生爲化度故雖作是觀不起煩惱是名菩薩
勇進無盡云何菩薩修習無盡如所發起一

切善心常願菩提是名菩薩修集無盡何以
故以諸善根迴向阿耨多羅三藐三菩提初
無盡故舍利弗譬如天雨一滴之水墮大海
中其滴雖微終無減盡菩薩善根願向菩提
亦復如是無有減盡修集善根者所謂正迴
向修集善根爲護衆生修集善根爲隨衆生
之所須故修集善根爲欲成就一切智故修
集善根是名菩薩修集無盡云何菩薩教化
無盡衆生之性不可稱計菩薩於中不應稱
計若言一日教化三千大千世界滿中衆生如是
計數乃至無量不可思議不可稱劫教化衆
生者雖作如是教化衆生不可稱計不可思

議於衆生分猶未是化百分千分百千分百
千万分乃至筭數譬喻所知衆生何以故是
衆生性無量無邊不可稱計不可思議若菩
薩聞作是說不驚不怖不畏當知是菩薩勤
修精進是名菩薩教化無盡云何菩薩助道
無盡菩薩所修助道功德無量無邊菩薩於
中不應限量何以故一切衆生所有功德若
去來現在及聲聞緣覺所有功德於佛世尊
始是成就一毛孔功德如是一一毛孔所有
功德乃至一切毛孔功德聚集成就始成如
來一隨形好如是一一隨形好等乃至一切
隨形好功德聚集成就如是成就如來一相

如是一一相至三十相聚集如是三十相百
倍功德始成如來眉間毫相乃至修集倍是
毫相百千功德始成如來無見頂相是名菩
薩助道功德無盡云何菩薩助智無盡菩薩
所修助智無量無邊菩薩於中不應限數若
三千大千世界所有衆生如一信行所成就
智如是信行比一法行所成就智百分千分
百千分百千萬分乃至筭數譬喻所不能及
若三千大千世界衆生悉為法行比一八人
所成就智百分千分百千分百千萬分乃至
筭數譬喻所不能及若三千大千世界所有
衆生悉為八人智比一須陀洹所成就智百

分千分百千分百千萬分乃至筭數譬喻所
不能及若三千大千世界所有衆生悉爲須
陀洹智比一斯陀含所成就智百分千分百
千分百千萬分乃至筭數譬喻所不能及若
三千大千世界所有衆生悉爲斯陀含智比
一阿那含所成就智百分千分百千分百千
万分乃至筭數譬喻所不能及若三千大千
世界所有衆生悉爲阿那含智比一阿羅漢
所成就智百分千分百千分百千萬分乃至
筭數譬喻所不能及若三千大千世界所有
衆生悉爲阿羅漢智比一緣覺所成就智百
分千分百千分百千萬分乃至筭數譬喻所

不能及若三千大千世界所有衆生悉成緣
覺智比一百劫菩薩所成就智百分千分百
千分百千万分乃至筭數譬喻所不能及若
三千大千世界所有衆生悉爲百劫菩薩所
成就智比一得忍菩薩所成就智百分千分
百千分百千万分乃至筭數譬喻所不能及
若三千大千世界所有衆生悉爲得忍菩薩
所成就智比一得不退菩薩所成就智百分千
分百千分百千万分乃至筭數譬喻所不能
及若三千大千世界所有衆生悉得不退菩
薩智比一補處菩薩所成就智百分千分百
千分百千万分乃至筭數譬喻所不能及若

無量無邊世界衆生悉如補處所成就智比
一如來是處非處智百分千分百千分百千
万分乃至筭數譬喻所不能及摠說如來諸
力無畏不共之法亦復如是若菩薩聞作是
說不驚不怖不畏當知是菩薩勤行精進是
名菩薩助智無盡云何菩薩助慧無盡一切
衆生所有心行不可窮盡菩薩於中不應計
數若過去未來現在衆生所有心行若有一
人於一念中具如是等三世衆生所有心行
如是念念皆亦如是具諸心行如一人心中
所具心行一切無量無邊衆生皆亦如是若
過去未來現在衆生所有貪婬瞋恚愚癡及

諸煩惱若有一人於一念中具如是等三世
衆生所有煩惱如是念念皆亦如是具諸煩
惱無量無邊如一人心中所具諸結一切無
量無邊衆生皆亦如是菩薩於中生慧光明
一念慧光無諸塵翳悉照過去未來現在衆
生煩惱諸心所緣境界生任滅相無有遺餘
是菩薩於諸衆生三世相應諸煩惱等無不
盡知舍利弗譬如虛空無所不覆菩薩慧光
亦復如是無所不照若菩薩聞作是說不驚
不怖不畏當知是菩薩勤行精進是名菩薩
助慧無盡云何菩薩修集助佛法無盡菩薩
所行修助佛法無量無邊若菩薩於中不應

限量從初發心至坐道場於其中間修行具足六波羅蜜修行具足諸助道法如是一切發心修行一切善根不可稱計悉助佛法是名菩薩修助佛法而無有盡是名菩薩八事修行精進無盡復次舍利弗菩薩精進亦不可盡若身善業若口善業若意善業常勤不任何以故菩薩所作精進常與身口意相應雖身口精進皆由於心心為增上云何菩薩心精進耶所謂心始心終云何心始初發心故云何心終菩提心寂滅故云何心始於諸衆生起大悲故云何心終無我人故云何心始攝衆生故云何心終不取諸法故云何心始

不厭生死故云何心終無三界故云何心始
捨所有故云何心終無所輕故云何心始受
持戒故云何心終不持戒故云何心始修行
忍故云何心終無忿諍故云何心始發行諸
善故云何心終獨不雜故云何心始修集定
故云何心終心清淨故云何心始多聞無厭
故云何心終善思惟故云何心始習問義故
云何心終法無言說故云何心始求智慧故
云何心終斷戲論故云何心始修四梵行故
云何心終捨真智故云何心始具五通故云
何心終具漏盡故云何心始發念處故云何
心終念無思惟故云何心始發正勤故云何

心終統善不善故云何心始發如意分故云
何心終具報得故云何心始發諸根方便故
云何心終觀諸根法故云何心始集諸力故
云何心終智不壞故云何心始發助菩提分
故云何心終善知分別諸學方便故云何心
始求助道法故云何心終無進趣故云何心

始求寂滅故云何心終心永寂故云何心始
發起慧故云何心終善知法故云何心始覺
知因故云何心終善知因故云何心始從他
聞故云何心終於諸法中無放逸故云何心
始發嚴飭故云何心終知身性故云何心始
莊嚴口故云何心終聖嘿然故云何心始行

三脫故云何心終無所作故云何心始降四
魔故云何心終捨結習故云何心始知方便
故云何心終了於慧故云何心始善知發故
云何心終善知度故云何心始知世俗故云
何心終善知真諦故是名菩薩心精進也是
心具足精進無盡故說始終菩薩具足如是
作相而心未常住於作業是菩薩於諸業相
知而故作云何菩薩知而故作爲諸善根
故爲諸衆生修大悲故不離有爲一切佛真
妙智故不墮生死是名菩薩摩訶薩毗梨耶
波羅蜜而不可盡說是法時七十那由他諸
天及人發阿耨多羅三藐三菩提心三万二

千菩薩摩訶薩得無生法忍。今時舍利弗語
無盡意言善哉善哉。唯善男子。仁已。快說菩薩
毗梨耶波羅蜜。而不可盡。唯願仁者當說菩
薩禪波羅蜜。如諸菩薩所得無盡禪波羅蜜。
無盡意言。若菩薩摩訶薩以十六事修行禪
定。而無有盡。不與聲聞辟支佛共。何等十六
菩薩修定。無有吾我具足。如來諸禪定。故菩
薩修定。不味不著。不求已樂。故菩薩修定。行
於大悲。斷諸衆生煩惱結。故菩薩修定。增益
諸禪觀見。欲界諸過患。故菩薩修定。具諸通
業。爲知衆生諸心行。故菩薩修定。其心柔順
於衆生中。得自在。故菩薩修定。諸禪三昧善。

知入出過於色界無色界故菩薩修定其心
寂滅勝於二乘諸禪三昧故菩薩修定更無
有廢畢竟已作故菩薩修定無諸衰耗善斷
除滅諸習氣故菩薩修定常入智慧過諸世
間到彼岸故菩薩修定爲知衆生心度脫一
切諸衆生故菩薩修定不斷三寶種具足無
盡諸禪定故菩薩修定無有退失其心常定
無諸錯謬故菩薩修定而得自在具足一切
諸善法故菩薩修定內善思惟斷入出息得
勝智故舍利弗是名菩薩以十六事修行禪
定而無有盡不與聲聞辟支佛共云何名爲
菩薩修定具諸通智故云何爲通云何爲智

若見諸色相是名爲通若知一切色盡法性而
不證盡是名爲智若聞音聲是名爲通解了
三世一切音聲無言辭相是名爲智若知一
切衆生心行是名爲通若知心行悉皆滅盡
不證於滅是名爲智若念過去是名爲通若
知三世無有罣礙是名爲智若能遍至諸佛
世界是名爲通若知佛界同虛空相是名爲
智若求諸法無破壞相是名爲通若不見法
是名爲智若不壞世間是名爲通若不見雜
行是名爲智若過梵釋護世天王是名爲通
過於二乘學無學智是名爲智是名菩薩修
行禪定通智差別唯舍利弗菩薩善知一切

衆生煩惱亂心是故修集諸禪定法助成任
心舍利弗如是衆生煩惱心亂菩薩於中善
修聚集助成禪定今此禪定任平等心是名
菩薩修行禪定若任衆生平等智中是名爲
定心行平等性相平等畢竟平等發行平等
是名爲定住於施戒忍辱精進禪定智慧及
諸法等是名爲定如定等者則衆生等衆生
等者則諸法等入如是等是名爲定如是等
定則等於空等於空者則衆生等衆生等者
諸法得等入如是等是名爲定如空等者則
無相等無相等者則無願等無願等者則無
作等無作等者則衆生等衆生等者則諸法

等入如是等是名爲定自心等故他心亦等
是名爲定一切等者所謂利衰如地水火風
得是等心心如虛空無有高下常住不動所
行威儀常定不轉本性自尔不掉不高自在
無畏寂嘿無言知義知法知時非時隨世所
行不雜於世捨世八法滅一切結遠離憤鬧
樂於獨處菩薩如是修行諸法於諸禪定心
安止住離世所作是菩薩以方便慧入禪波
羅蜜入禪定時生大悲心爲諸衆生是名方
便其心永寂是名爲慧入時念佛是名方便
不依止禪是名爲慧入時攝取一切善法是
名方便不分別法性是名爲慧入時趣向莊

嚴佛身是名方便於佛法身不生分別是名
爲慧入時念佛聲如梵音是名方便於法性
中無言說相是名爲慧入時受持心如金剛
是名方便思惟諸法本性不亂是名爲慧入
時不捨本所誓願教化衆生是名方便於一
切法思惟無我是名爲慧入時思惟一切善
根是名方便思惟善根性無所住是名爲慧
入時遍觀諸佛世界是名方便見諸佛界同
於虛空是名爲慧入時莊嚴菩提道場是名
方便觀所莊嚴同於寂滅是名爲慧入時欲
轉無上法輪是名方便思惟法輪無轉不轉
是名爲慧入時一向修助覺分是名方便爲

知衆生諸熱惱心是故修集如來禪定知一切法相應不相應有相無相一切相續隨順菩薩決定思惟是名爲慧是名菩薩入於禪定方便慧也如是菩薩禪波羅蜜方便智慧二事俱行得佛法器一切諸魔不能破壞說是法時三万三千菩薩得日燈三昧何因緣故名日燈三昧譬如日出燈火月光星宿諸明悉不復現菩薩大士得是定已先所修智一切二乘學與無學及餘衆生所得諸智皆亦如是悉不復現是名日燈三昧菩薩任於禪波羅蜜即於無量百千種種諸禪三昧而得自在今於此中當說少分其名曰電燈三

昧淨三昧月光三昧淨莊嚴三昧日光三昧
不可思議三昧勇出三昧照明三昧無垢光
明三昧功德光明三昧一切法中得自在三
昧吉道三昧無憂三昧堅稱三昧湧出如須
彌山等三昧法炬三昧法健三昧法尊三昧
自在知一切法三昧住法聚三昧摠持法淨
三昧隨知他心行三昧法幢瓔珞三昧燒一
切煩惱三昧破四魔力三昧十力聲勇健三
昧無礙斷礙三昧手燈三昧施得名聞三昧
持地三昧住無我如須彌山三昧勝諸明智三
昧智燄三昧生慧三昧修禪三昧無量自在
三昧心調伏無我無我所成就三昧水月三

昧日聲三昧無有高下如佛三昧離相三昧
如善調象師子遊戲三昧念佛三昧念法得
智自在無礙三昧無退不退三昧不眴三昧
勝淨光無我三昧空三昧無相三昧無願三
昧任心平等三昧金剛三昧增上三昧無能
勝三昧旋三昧淨聲三昧善分別三昧離煩

惱三昧廣大如空三昧入諸功德三昧念意
進覺三昧勇慧三昧辯無盡三昧語無盡三
昧揔持三昧不忘三昧善作三昧觀一切世
三昧善知所樂三昧生踊躍三昧勇慈心淨
三昧大悲根本三昧入喜三昧捨離二纏三
昧法義三昧法作三昧智炬三昧智海三昧

不波蕩三昧一切心喜三昧調伏三昧解脫
智三昧已自在三昧法場金剛幢三昧蓮華
三昧蓮華增上三昧離世法三昧不動三昧
慧增上三昧諸佛所念首楞嚴三昧無諍三
昧火三昧火明三昧解脫勝智三昧莊嚴佛
身三昧遍照三昧入衆生心歡喜三昧順助
道三昧莊嚴諸波羅蜜三昧寶鬘三昧與諸
覺華三昧與解脫果三昧甘露三昧速疾如
風三昧實際三昧遮海濤三昧山相博三昧
廣大神通三昧見無量諸佛三昧聞持三昧
不乱三昧一念知無量功德海淨三昧如是
等不可計那由他諸三昧入禪波羅蜜三昧

悉得清淨舍利弗是名菩薩修行禪定而不
可盡今時舍利弗語無盡意言善哉善哉善
男子仁已快說菩薩禪波羅蜜唯願仁者當
說菩薩般若波羅蜜如諸菩薩所得無盡般
若波羅蜜善男子般若波羅蜜云何行去何
入無盡意言唯舍利弗般若波羅蜜如聞修
行善入思惟舍利弗言唯善男子云何如聞
修行無盡意言聞者具八十行何等八十欲
修行順心行畢竟心行常發起行親近善友
行無憍慢行不放逸行恭敬行隨順教行從
善語行數往師所行至心聽法行善思惟行
不亂心行勤進心行生寶想行起樂想行除

諸病行念器行進覺行意喜行入覺行聞無
厭行增長捨行調智行親近多聞行發歡喜
行身輕悅行心柔和行聞無疲倦行聞義行
聞法行聞威儀行聞他說行聞所未聞行聞
諸通行不求餘乘行聞諸波羅蜜行聞菩薩
藏行聞諸攝法行聞方便行聞四梵行聞念
正智行聞生方便行聞無生方便行觀不淨
行思惟慈行觀因緣行觀無常行觀苦行觀
無我行觀寂滅行觀空行觀無相行觀無願
行觀無作行作善行持真實行不失行好惡
任處防護心行勤進無懈行善分別諸法行
知諸煩惱非伴侶行護諸善法自伴侶行降

伏煩惱非伴侶行親近正法財行斷諸貧窮
行智者所讚行欣樂利根行衆聖所勸行令
非聖者生歡喜行觀諸諦行觀陰過患行思
量有爲多過患行思義行不作一切惡行自
利利他行隨順增進諸善業行進增上行得
一切佛法行舍利弗是名菩薩如其所聞具
八十行舍利弗菩薩摩訶薩行般若波羅蜜
具三十二事善入思惟何等三十二善入受
持定善入分別慧善入心柔和善入身獨行
善入十二緣善入不斷善入不常善入因緣
生法善入無衆生無命無人善入無來去住
處善入無進不斷因果善入空不懈善入無

相不廢善入無願不捨善入不證空無相無
願善入生諸禪三昧善入不隨禪定生善入
生諸通智善入不證無漏法善入內觀法善
入不證決定善入思量有爲法過患善入不
著有爲法善入觀一切衆生無我而不捨大
悲善入一切趣諸怖畏處善入雖生諸趣非
業故生善入離欲善入不證離欲法善入捨
所樂欲善入不捨法樂善入捨一切戲論諸
覺善入不捨方便諸觀舍利弗是名菩薩行
般若波羅蜜三十二事善入思惟又復善思
惟者所謂善順句善順句者是不始句是不
終句是不任句是無依句是不動句是不猗

句是平等句是非等句是真實句是正真句
是不變句是清淨句是永寂句是不然句是
不舉句是不下句是不滅句是不增句是不
共句是不戲論句是如句是不如句是如非
如句是非如非不如句是如實句是三世平
等句是三際句是不住色句是不住受想行
識句是不住地大句是不住水火風句是不
住眼界色界眼識界句是不住耳界聲界耳
識界句是不住鼻界香界鼻識界句是不住
舌界味界舌識界句是不住身界觸界身識
界句是不住意識界句是念義句
是念智句是了義經句是念法句是名菩薩

善入思惟又復善思惟者所謂一切諸法若我無我如是諸法隨順觀察若知衆生無有我者即是隨順觀察諸法如是觀察即是善入思惟如善思惟即是思惟生死涅槃同一法界觀是二句無有差別如是見者是名勲進善入思惟若觀黑法及以白法二性平等無有差別是名勲進善入思惟若觀諸扼及以無扼不動不恃是名勲進善入思惟若菩薩起善思惟爲諸衆生而不捨離於諸法相亦不分別是名菩薩發善思惟舍利弗如聞行者如是得入報善思惟是名爲慧舍利弗善菩薩慧者有十六法不於中住云何

十六不任無明行識名色六入觸受愛取有生老死乃至不任無明滅至生死滅不任根本身見乃至不任六十二見不任高下乃至不任世法利衰毀譽稱譏苦樂不任慢慢增上慢慢我慢下慢慢憍慢邪慢乃至不任二十煩惱不任因貪所起諸結若麤若細若上中下乃至不任貪欲所起一切諸結不任癡闇覆蓋諸礙乃至不任因癡所起一切諸結不任姪欲愛濁不任死陰煩惱天魔乃至不任因魔所起諸魔事等不任我人衆生壽者養育士夫乃至不任取衆生相不任業障報鄣法障煩惱障諸見鄣乃至不任一切習氣

不任思想憶想分別想緣相想境界見聞覺
知乃至不任一切諸結不任隨衆生心行智
乃至不任八万四千法聚不任慳貪布施破
戒持戒瞋恚忍辱懈怠精進亂意禪定愚癡
智慧乃至不任諸波羅蜜伴非伴等不任定
亂邪正善不善世間出世間可作不可作有
漏無漏有爲無爲黑法白法生死涅槃乃至
不任一切諸法伴非伴等不任衆生異相諸
乘異相佛界異相諸佛異相諸法異相聖衆
異相乃至不任一切異相不任知不知識不
識世諦真諦乃至不任一切諸相所謂菩薩
思惟慧者無聞無行無身無相無形無爲如

是真慧不住一切憶想思惟心作止任名字
異相舍利弗是名菩薩真智慧者不住如是
十六法中舍利弗云何菩薩慧者處所具八
方便何等八諸陰方便諸界方便諸入方便
諸諦方便諸緣方便三世方便諸乘方便諸
法方便云何諸陰方便若說諸陰如沫如泡
如熱時燄如芭蕉樹如幻如夢如呼聲響如
鏡中像如影如化色如水沫如水沫性非我
非衆生非命非人色亦如是能如是如是名
菩薩觀色方便受喻如泡想喻如燄行如芭
蕉識喻如幻如泡如燄如芭蕉幻性無我無
衆生無命無人受想行識亦復如是能如是

知是名菩薩觀受想行識方便諸陰如夢如響如像如影如化如化等性無我無衆生無命無人是諸陰等亦復如是能如是知是名菩薩觀陰方便所謂陰者即世間相世間相者是可壞相如可壞相即無常性苦性無我性寂滅性能如是知是名菩薩觀陰方便云何菩薩知界方便法界地界水火風界是法界中無有堅相濕相熱相動相法界眼界耳界鼻舌身意界是法界中無有見相聞相嗅相別相覺相知相法界色界聲香味觸法是法界中無眼可見相耳可聞相鼻可嗅相舌可別相身可覺相意可知相法界眼識

界耳鼻舌身意識界是法界中無眼識知色
乃至無意識知法法界色界法界非色作相
乃至法界亦復如是法界我界無二無別法
界欲界色界無色界我界生死界涅槃界無
二無別法界虛空界一切法界我界空界無
相無願無作不出不生悉無所有等如涅槃
虛空涅槃及一切法等無有二如是無量有
為法界入無為界能如是知如是說者是名
菩薩知界方便云何菩薩觀入方便如佛所
說眼空我空我所空何以故是眼性中無我
無我所耳鼻舌身意空亦復如是觀是入者
見一切法若善不善無有二相是名菩薩觀

入方便若眼入色若見眼色入離欲不證離
欲法是名菩薩觀入方便耳入聲入鼻入香
入舌入味入身入觸入意入法入若見離欲
不證離欲法是名菩薩觀入方便所謂入者
若聖入非聖入云何聖入若修集道云何非
聖入不修集道若菩薩住道於不修道者生
大悲心不捨入道是名菩薩觀入方便云何
菩薩觀諦方便所謂甚深難入云何難入若
苦智集智滅智道智苦智者觀陰無生集智
者觀斷愛受因滅智者觀無明等諸煩惱無
有和合道智者得平等觀於一切法無所著
菩薩若於四聖諦中作如是觀而不取證為

化衆生是名菩薩觀諦方便復有三諦何等
三俗諦第一義諦相諦云何俗諦若世間所
用語言文字假名法等云何第一義諦乃至
無有心行何況當有言語文字云何相諦觀
一切相同於一相一相者即是無相菩薩隨
順俗諦而不厭倦觀第一義諦而不取證觀
諸煩惱相諦一相無相是名菩薩觀諦方便
復有二諦何等二俗諦第一義諦何等俗諦
若說苦集道諦若世間言語文字假名法等
云何第一義諦若於涅槃法終不忘失何以
故如與法界其性常故菩薩隨俗不生厭倦
觀第一義而不取證復有一諦何等爲一於

一切法無所倚著為化衆生現有所著是名
菩薩觀諦方便復次五陰苦若見五陰苦
相是名為苦觀苦即空是名苦智觀苦聖諦
若觀五陰諸煩惱愛因見因是名為集若觀
愛因見因不取不著不希不求是名集智觀
集聖諦若五陰畢竟盡相過去已滅未來未
生現在不任是名為滅能如是知是名滅智
觀滅聖諦若得道者證集滅智比智知已
名為道若於是中悉見空性是名道智觀道
聖諦若能如是觀四聖諦是名菩薩觀諦方
便若一切受是名為苦若於諸受思惟分別
是名苦智觀苦聖諦受因和合是名為集若

於受因知如真實是名集智觀集聖諦若除
諸受無受者受觀受滅盡不證於滅為化衆
生是名滅智觀滅聖諦若有所受是名為道
雖有和合猶如筏喻不為所受不求於道是
名道智觀道聖諦作如是知見四聖諦清淨
平等是名菩薩觀諦方便復次略說生苦是
名為苦若觀於生是名苦智觀苦聖諦生從
因緣是名為集若觀有非有是名集智觀集
聖諦一切生非生是即非滅若法不生即無
有滅是名為滅若觀此滅即是滅智觀滅聖
諦若如是等推求稱量思惟分別是名為道
若滅如是求稱量等入法門者是名道智觀

道聖諦若住於智不證聖諦是名菩薩觀諦
方便云何菩薩觀緣方便集不善思惟故無
明集無明集故行集行集故識集識集故名
色集名色集故六入集六入集故觸集觸集
故受集受集故愛集愛集故取集取集故有
集有集故生集生集故老死集老死集故憂
悲苦惱集若知如是諸苦聚集是名菩薩觀
緣方便若住如是諸法聚集則不長養無所
作無諍訟無有主無所屬無繫縛所謂若因
善法因不善法因不動法若因向涅槃法如
是等法如實分別若諸衆生根量齊限因是
諸根所作諸業若有受報及非受報善知其

因聚集方便是名菩薩觀緣方便不善思惟
滅則無明滅無明滅故行滅行滅故識滅識
滅故名色滅名色滅故六入滅六入滅故觸
滅觸滅故受滅受滅故愛滅愛滅故取滅取
滅故有滅有滅故生滅生滅故老死滅老死
滅故憂悲苦惱諸苦聚滅若知如是諸苦聚
滅是名菩薩觀緣方便一切諸法屬因屬緣
屬和合若法屬因緣和合是法則不屬我人
衆生壽命若法不屬我人衆生壽命則不入
法數能如是知是名菩薩觀緣方便若菩薩
所修諸法爲助菩提安止菩提如是諸緣悉
見滅盡而不取證爲化衆生是名菩薩觀緣

方便云何觀三世方便若念過去己身他身
善不善心心數法不善心法呵責毀訾善
心數法悉以迴向無上菩提是名菩薩觀過
去方便若未來世心心數法一向專念菩提
之道若起善心願悉迴向無上菩提所有不
善心心數法不令入心發如是願是名菩薩
未來方便若現在世心心數法善思惟等所
作諸業悉已迴向無上菩提是名菩薩觀現
在方便作如是方便是名菩薩觀三世方便
復次善解三世空無所有若作是觀觀三世
空智慧力故若於三世諸佛所種無量功德
悉以迴向無上菩提方便力故如是方便是

名菩薩觀三世方便復次雖見過去盡法不
至未來而常修善精勤不懈觀未來法雖無
生出不捨精進願向菩提觀現在法雖念念
滅其心不忘發趣菩提如是方便是名菩薩
觀三世方便過去已滅未來未至現在不住
雖如是觀心心數法生滅散壞而常不捨聚

集善根助菩提法如是方便是名菩薩觀三
世方便復次若諸神通念過去世所作善根
念已迴向無上菩提念未來世未生善根願
心所嚮如意成就現在世中常生善根專念
不懈迴向無上菩提之道如是方便是名菩
薩觀三世方便復次若化衆生念過去世所

作善根助道功德所謂隨衆生心應可化者
如其所樂悉已化訖若未來世所有衆生或
須見佛及諸聖人而得度者隨形應適悉令
得度若現在世所有衆生若應聞法應見神
力亦隨所應皆悉化之隨所教化諸衆生已
則於三世成自他利如是之利悉爲菩提具
無礙智如是方便是名菩薩觀三世方便舍
利弗云何菩薩觀諸乘方便世有三乘何等
三聲聞乘緣覺乘大乘復有二乘何等二天
乘人乘云何菩薩觀聲聞乘佛未出世無聲
聞乘何以故從他聞法生於正見所謂聞者
持戒威儀威儀具故戒聚具足戒聚具足已

定聚具足定聚具足已慧聚具足慧聚具足
已解脫聚具足解脫聚具足已解脫知見聚
具足如是方便是名菩薩觀聲聞乘方便復
次觀聲聞乘若善不善及不動行心常毀咤
猷離三界觀一切行無常苦無我寂滅涅槃
乃至一念不希受生常懷怖懼心不甘樂觀
陰如怨家如毒蛇入如空聚於一切趣不願
受生若能如是開示分別是名菩薩觀聲聞
乘方便云何菩薩觀緣覺乘方便若緣覺出
世觀其所行如實知之緣覺所行出過聲聞
所有功德欲精進不放逸持戒少聞不多供
養諸佛出世尊給侍使令以根中故常有猷心

所作衆事皆悉。少猷患憤。開常樂。遠離獨
住。空閑威儀。庠序出入。凝重安心。靜嘿簡於
人事。能爲衆生現世福田。其心翫樂觀。十二
緣常念一法。出世涅槃。數遊禪定。不從他聞。
自然覺了。少分境界。因緣悟道。故名緣覺。若
能如是。開示分別。是名菩薩觀緣覺乘方便。
云何菩薩觀大乘方便。其乘無量。今於此中
當說少分。是乘無量。悉能容受一切衆生。無
罣礙。故是乘增長一切善根。令無量衆生得
受用。故是乘具足諸波羅蜜。能隨衆生心行
化。故是乘能過助道之法。進趣無礙。至道場
故。是乘平等無礙。光明照於一切無量衆生。

悉堪受故是乘無畏過怯弱道悉能示現諸
佛法故是乘能壞一切諸魔外道邪衆了十
二緣建立佐助菩提幢故是乘能除一切諸
邊有無斷常因緣諸見所起煩惱鄣礙覆蓋
疑網調戲得佛無礙真智慧故是乘富足具
諸珍寶真實不虛能益衆生大悲勇猛本願
成就故是乘具足十力無畏不共之法相好
嚴身身口意故如是方便是名菩薩觀大乘
方便云何菩薩觀一切法方便所謂若有爲
若無爲菩薩於中善知方便云何善觀有爲
方便所有身善業口善業意善業願以迴向
無上菩提是名有爲方便若觀身口意善業

同菩提相迴向菩提是名菩薩觀無爲方便
復次有爲方便若能聚集五波羅蜜是名有
爲方便雖知般若波羅蜜其性無爲於所聚
集終無厭賤要欲具足諸波羅蜜深解善根
同無漏菩提而猶願成一切種智是名菩薩
無爲方便復次有爲方便住於無礙平等心
中以四攝法攝取衆生是名有爲方便云何
無爲方便善解衆生無我無人無所希求知
四攝法同無爲解脫而能迴向一切種智是
名無爲方便復次有爲方便若諸煩惱生死
相續斷令不起所有善根助菩提者令不斷
絕乃至不行少煩惱分是名有爲方便云何

無爲方便雖觀空無相無願知此三空即助
道方便故能不證是名無爲方便復次有爲
方便雖在三界不爲三界煩惱所汙是名有
爲方便云何無爲方便雖出三界不證於出
是名無爲方便如佛所說知諸法方便則能
具足一切種智何以故一切種智無量無邊
具足正念慧方便故是故名爲一切法方便
舍利弗是名菩薩智慧所緣八方便也舍利
弗是八方便能攝菩薩無盡智慧舍利弗是
慧能解觀了善法不善法故是慧如箭善射
法故是慧能行聖法現在故是慧真解斷除
諸見煩惱鄣礙諸覆蓋故是慧定願悉能滿

是本所求故是慧消融能除煩惱諸焦熱故
是慧悅豫不斷法樂故是慧正念了所緣義
故是慧安住具三十七助道法故是慧得相
如所行乘能具足故是慧解相性智照故是
慧能度過諸流故是慧能進成正決定故是
慧正見具足一切諸善法故是慧歡喜墮煩
惱者能拔濟故是慧殊勝得頂法故是慧微
妙自然覺故是慧不行不近三世故是慧攝
取具一切方便故是慧能斷過諸想思故是
慧不放逸捨離闇朦故是慧初始發行一切
諸善法故是慧能發具諸乘故是慧照明除
無明網故是慧與眼一切衆生如其所解得

明了故是慧無依過眼色故是慧第一義出
真實故是慧無諍善分別故是慧明了向智
門故是慧無盡能遍行故是慧不逆見十二
緣故是慧解脫諸纏繫縛悉善斷故是慧不
雜離於一切障礙法故舍利弗一切衆生所
有心行如是智慧悉能照達知衆生心行慧
思智知諸煩惱門如是智慧皆悉觀了若聲
聞緣覺菩薩如來所有智慧是菩薩悉能遍
學舍利弗是名菩薩無盡之慧以是無盡慧
具無盡智說是法時三萬二千菩薩善根熟
者得無生法忍

無盡意菩薩經卷第二

周

厭

一 焰 反

不掉

下 徒 反

寶鬘

下 正 作 鬘 反

梔

音 寢 字

夢

菽喻

上 音 伐 簿 亦 作 祇 簿 排

也

凝重

上 魚 陵 反

嚴整

貞 反



猪飼順良寫附

